

Dielangana dia Meji pa Lumu Luimpe lua Yone

No. 33

Yesu udi umueneka kudi bayidi bandi ku dishiba dia Galela

Simona Petelo ne bakuabo badi baya kukuata minyinyi ya mu mayi

Pakajika malu aa, Yesu wakamueneka kabidi kudi bayidi bandi ku dishiba dia Tibelia; wakamueneka nunku: Simona Petelo, ne Toma udibo babikila ne, Didumo, ne Natanaele wa Kana wa mu Galela, ne bana ba Zebedayo, ne bayidi bandi bakuabo babidi bakadi popamue (Yone 21:1,2).

Kunyima kua dibika dia Yesu, mukenji wa muanjelo kudi bakaji bakadi ku lukita lua Yesu, wakadi ne, “Kanuntshinyi; ndi mumanye ne, Nudi nukeba Yesu, wakashipabo ku mutshi mutshiamakane. Yeye kena kunoko, wakubika bu muakambayi ... yayi bienu lubilu, nuambile bayidi bandi ne, Yeye wakubika ku lufu; monayi, neadianjile kumpala kuenu mu Galela, nenumumoneku; nakunuambila bualu ebu” (Matayo 28:5-7).

Bayidi ba Yesu bakadi bindila difika diende mu Galela. Dituku dikuabo Petelo wakambila bayidi bakuabo ne, Ndi nya kukuata minyinyi ya mu mayi. Bakuabo bakaya nandi kadi butuku abu kabakakuata tshintu (Yone 21:3).

Badi bamona Yesu muimane ku muelelu wa mayi

Kadi pakamba panshi kutoka, Yesu wakadi muimane ku muelelu wa mayi; kadi bayidi kabakamumanya ne, NYesu. Yesu wakabakonka ne, Bana, nudi ne tshia kudia, anyi? Bakamukudimuna ne, Nansha. Yeye wakabambila ne, Elayi tupamba ku tshianza tshia balume, nenupete minyinyi. Bakatuela, tshitupa tshipi kabakamanya mua kutukoka bualu bua bungi bua minyinyi. Muyidi, wakadi Yesu musue, wakambila Petelo ne, Mukelenge. Pakunvua Petelo ne, Mukelenge, wakadijingila tshivualu tshiandi bua wakadi mutshivule, wakadiela mu mayi. Kadi banga bayidi bakalua mu buatu bukesa, benda bakoka tupamba tuule tente ne minyinyi, bualu bua ku mpata kuakadi pabuipi, ntanta bu wa meta lukama. Pakafikabo ku mpata, bakamona makala a kapia akenka ne minyinyi wa mu mayi muteka pa kapia ne mutanda wa bidia. Yesu wakabambila ne, Luayi ne minyinyi mikuabo inuakukuata katataka. Simona Petelo wakabuela mu buatu, wakakoka tupamba ku mpata, tuule tente ne minyinyi minene lukama ne makumi atanu ne isatu; minyinyi yakadi bungi nunku, kadi tupamba katuakadi tupandike (Yone 21:4-11).

Katueni ne mpata ne, Pakamona Petelo makala a kapia akenka, yeye wakavuluka kupidia kuende kua Yesu pakadiye mu nzubu wa muakuidi munene, pakadiye wimana ne bena lukuna ba Mukelenge, wota kapia ku kapia ka makala.

Toma, muena mpata, wakadiku. Toma kakitabuja bumanyishi bua bayidi bakuabo ne, “Tuakumona Mukelenge” (Yone 20:25). Katataka Yesu udi nabo, Mukelenge kena ubambila bualu bua mapanga abo. Udi ubambila ne, Luayi nudie !

Diambedi Mukelenge Yesu kayi muanze kuambila bayidi bua kudia nandi, yeye wakabambila ne, Elayi tupamba ku tshianza tshia balume, nenupete minyinyi. Bakatuela, tshitupa tshipi kabakamanya mua kutukoka bualu bua bungi bua minyinyi. Yeye wakamana kubabikila Petelo ne Andele bua kuikala bilembi bia bantu (Matayo 4:18,19), kadi bakuabo bakadi bilembi ba bantu kabidi. Bua bualu buabo bantu ba bungi be bakitabuja Lumu Luimpe.

Luayi nudie

Yesu wakabambila ne, Luayi nudie. Kakuakadi muyidi wakadi ne dikima dia kumuebeja ne, Wewe nganyi? Bakadi bamumanye ne, Mukelenge. Yesu wakalua, wakamema

mutanda wa bidia, wakabapawu ne munyinyi kabidi. Ewu wakadi musangu muisatu wakamueneka Yesu kudi bayidi, pakabikeye ku lufu (Yone 21:12-14).

Luayi nudie didi dibikila dia dinanga. Mukelenge wakasua bua kuikala ne bantu bandi. Mukelenge wakadi ne munyinyi wa mu mayi muteka pa kapia ne mutanda wa bidia. Kadi katataka udi wamba ne, Luayi ne minyinyi mikuabo inuakukuata katataka. Buonso buabo bakadia popamue mu buobumue.

Mukelenge udi ukonka Petelo

Pakajikijabo kudia, Yesu wakakonka Simona Petelo ne, Simona wa Yona, wewe udi mutambe aba bakuabo kunnanga, anyi? Yeye wakamuambila ne, Bulelela, Mukelenge, wewe udi mumanye ne, Ndi mukusue. Yesu wakamuambila ne, Udishe bana banyi ba mikoko. Wakamukonka tshiakabidi ne, Simona wa Yona, udi munnange, anyi? Yeye wakamuambila ne, Bulelela, Mukelenge, wewe udi mumanye ne, Ndi mukusue. Yesu wakamuambila ne, Ulame mikoko yanyi. Wakamukonka tshiakasatu ne, Simona wa Yona, udi munsue, anyi? Mutshima wa Petelo wakanyingalala bua yeye wakamukonka tshiakasatu ne, Udi munsue, anyi? Wakamuambila ne, Mukelenge, wewe udi mumanye malu onso; udi mumanye ne, Ndi mukusue. Yesu wakamuambila ne, Udishe mikoko yanyi (Yone 21:15-17).

Petelo wakapidia Mukelenge misangu isatu, katataka Mukelenge udi umukonka tshiakasatu ne, Udi Munsue, anyi? Mutshima wa Petelo udi unyingalala.

1) “Simona wa Yona, wewe udi mutambe aba bakuabo kunnanga, anyi?”

Petelo wakandmuna ne, “Bulelela, Mukelenge, wewe udi mumanye ne, Ndi mukusue”. Mukelenge wakamuambila ne, “Udishe bana banyi ba mikoko”.

Bana ba mikoko ba Mukelenge badi ba mushinga mukole kudiye, nansha badi batekete. Bana badi mua kutuambila bua bena bitabuja bapia-bapia badi ne bualu bua kudiunda mu ditabuja. Bantu ba Mukelenge badi ne bia kudia bikumbane bua bualu buabo. Bena kuitabuja bapia-bapia - mabele bua kudiunda.

2) “Simona wa Yona, udi munnange, anyi?”

Petelo wakambila Mukelenge ne, “Bulelela, Mukelenge, wewe udi mumanye ne, Ndi mukusue”. Mukelenge wakamuambila ne, “Ulame mikoko yanyi”. Petelo wakalua mulami muimpe, wakakolesha mitshima ya balami bakuabo ne, “Nulame tshisumbu tshia mikoko ya Nzambi tshidi munkatshi muenu, nubalame, kanuyi benzeshibue ku bukole, kadi ne mitshima ya disanka bu mu disua dia Nzambi; kambualu bua kukeba biuma, kadi nuikale ne mutshima mulongolola bimpe; kanuikadi bu bakokeshi ba badi kunyima kuenu kadi nudivuije bifuanyikiji bimpe kudi mikoko” (1 Petelo 5:2,3).

3) “Udi munsue, anyi?”

Petelo wakamba ne, “Mukelenge, wewe udi mumanye malu onso; udi mumanye ne, Ndi mukusue. Yesu wakamuambila ne, Udishe mikoko yanyi” (Yone 21:15-17).

Badi badisha mikoko ya Mukelenge bimpe badi ne lungenyi bua kumanya mushindu wa bia kudia bidi bimpe bua bualu buayi. “Muntu yonso udi wamua mabele kena muanze kujalama mu diyi dia buakane, bualu bua utshidi muana mukese. Bia kudia bikole bidi bua bantu bakole, bia bobo mene badi ne meji abo mibidila a kujingulula nawu tshidi tshimpe ne tshidi tshibi, bualu bua badi balonda malu makane” (Ebelu 5:13:14).

Mukelenge Yesu wakamba ne, “Bakafunda diyi ne, Muntu kikadi biandi ne muoyo bualu bua bidia nkayabi, ikale nandi nawu bualu bua meyi onso adi alupuka mukana wa Nzambi” (Matayo 4:4). Tudi ne diyi dia Nzambi bualu !

Undonde

Bulelela, bulelela, ndi nkuambila ne, Pawakadi nsongalume, wakadi udisuika mukaba, wakadi wendakana kuonso kuwakasua; kadi pawakulumpa, wewe newolole bianza biebe, mukuabo neakusuike mukaba, neakutuale kudi kuyi musue. Yesu wakamba diyi edi bua kumumanyisha lufu luatumbisheye nalu Nzambi. Pakambeye nunku, wakamuambila ne, Undonde (Yone 21:18,19).

Petelo wakalonda Mukelenge Yesu, muntu wa kueyemena, too ne pakafueye ku tshianza tshia bena lukuna bandi, pakadiye muntu mukulumpe. Meyi andi a kunshikidilu akadi bua kukolesha nawu bantu ba Nzambi mu matuku makole. “Nudiunde mu ngasa ne mu dimanya bia Mukelenge wetu ne Musungidi Yesu Kilisto. Butumbi buikale kudiye katataka too ne ku dituku dia tshiendelele. Amen” (2 Petelo 3:18).

Yone wakadi mumonyi wa kueyemenibua. “Muyidi ewu [Yone] mene wakamba malu aa, wakaafunda; tudi bamanye ne, diyi diandi ndilelela” (Yone 21:24).

**“Malu makuabo a bungi adiku kabidi akenza Yesu;
biaafundabo onso, ndi ngamba ne,
Buloba bujima mene kabuena bukumbana
miaba ya kuteka mikanda yafundabo”
(Yone 21:24-25).**